

Wednesday, May 6, 2026

Time - 2:30pm - 2:35pm

**AKASHVANI AIZAWL
REGIONAL NEWS UNIT**

HOME MINISTER

Home Minister Pu K.Sapdanga'n Mizoram ralmuanna chu ngaia nei lo tur leh inthlahdah phah nan hmang lo turin Mizoram Police te a chah.

Vawiina Mizoram Police ten PHQ Khatla GS Arya Mess-ah kumin 2026-2027 'Year of Discipline' hawna inkhawm an neih a hmanpuinnaah he thu hi sawiin, Home Minister Pu K.Sapdanga chuan Police tan Discipline chu duhthlanna a ni lo a, an inngahna lungphum a ni a ti a. Mipui rorelna, Democracy laimu chu, mipui leh Sorkar inkara inrin ngamna a ni tih sawiin, mipui rinna chu amaha lo awm a ni lo a, nitin hlawhchhuah ngai a ni a ti a. Home Minister chuan Mizoram ralmuanna chu ngaia neih awl tak a nih avangin, Mizoram police te chu inthlahdah phah nan hmang lo turin a chah a, Police tan chuan inthlahdahna chu an hmelma lian ber a ni tih sawiin, Police tha tehna chu hmun ralmuanga an chet dan ni lovin, harsatna a lo thlen thulha a inralrinna danah a inngat tel a, Police tha chu hun ralmuangah inthununna tha nen a inbuatsaih reng a tul tih a sawi a ni.

Home Minister chuan Mizoram inchhuanna, State ralmuang kan nihna chu Police Standard tihniamtu ni loin, inbuatsaihna hun tha petu ni reng zawk rawh se a duh thu a sawi a, chhun leh zan emaw, hun pui lai a ni emaw, harsatna leh chhiatna a thlenna hmun thlengin, tihphung tha leh inpuahchahna tha nen Mizoram Police chu an inralring reng tur a ni a ti. Kumina Mizoram Police thupui- in thununna, Discipline chu rawng an bawl sak mipuite hmuh theih turin Police te chezia, thusawi leh thutlukna siamah te a langchhuak tur a ni tih sawiin, Outpost kilkhawr ber atanga Aizawl khawpui lun lai ber thlengin Police te inthununna leh invawna chu a lang tur a ni a ti a. Year of Discipline chu mipuiin Mizoram Police chung a rinna an ngah ngam lehzualna tur rahbi pawimawh tak a ni a rin ngheh tlat thu sawiin, a hawng a ni.



LAWNGTLAI FIRE

Nizan zanlai pelh hret khan Lawngtlai Chandmary Venga Pu Ainehliana Building, chhungkaw hnih in Dawr bungraw dahna Kudam atana an luah mek chu a kang a, Cheng nuai 40 hu bungrua a kang chhia.

Kangmei a chhuak tih hriat anih hian Vengchhung mipui tlankhawm nghalin, Fire Department pawh hrilh nghal an ni a, Kangmei hi a nasat hman avangin thelh mih mai theih anih loh lain, hmundang kangkailo in an thelh mit ani. Building neitu Pu Ainehliana chuan Kangmei hi Electric Current vanga chhuak anih a rin thu a sawi a, Kudam atan a luah mektu Pi Vanlalruati chuan kangmei chhuah chhan chu a ngaihna a hriat loh thu sawiin, Bungrua an ngah lai tak anih thu leh Cheng Nuai 20 man vel a kan chhiat thu sawiin, an Kudam lehlam chiah luahtu Pi Mary te bungrua

pawh Cheng Nuai 20 man vel a kan chhiat thu a sawi a, a vaiin Dawr bungrua hi Cheng nuai 40 man hu a chhia niin a sawi.

Kangmei a chhuak tih a hriatin Lawngtlai Bawrsap Pu Donny Lalruatsanga chu kangmei chhuahna ah hian a kal nghal a, Kangmei tuartute a tawrhpuu thu sawiin, Kangmei chhuahna chhan uluk taka chhui anih tur thu leh Sawrkar atanga tih theih an neihte enzui anih tur thu a sawi..



ACCIDENT CASE

Kumin February ni 25 a Kolasib leh Thingdawl inkara Truck in BIke a sut vanga Bike a chuang in a thih pahna a mawhphurtu ber a ngaih chu nimin tlai khan Lawngtlai Police te puihna in Kolasib Police ten Lawngtlai ah an man.

Kumin February Ni 25 zing dar 9:30 vel khan Kolasib leh Thingdawl inkar, Hmawngkhawthlir ah Kolasib lam pan a Bike a kal Pu Lalrosiama Kum 40 Bualpui khua chu Truck nen insuin, Truck Driver hi a tlanbova, he thilthleng hi Police ten an chhuizui zelna ah nimin tlai khan Lawngtlai Police te puihna in Kolasib Police ten Lawngtlai ah thilsual titu ni ngei a ngaih Samsul Islam Patharkandi, Karimganj chu man niin, Kolasib lam panpui nghal a ni.



MEETING ON NEIHLOH RELOCATION

Chief Minister Pu Lalduhoma hovin Neihloh Village Planning Committee an thu khawm a. Neihloh khaw thar tur Master Plan thlirhona an nei.

Neihloh khua hi a khaw puma leilung chetna hmun, khuarel chhiatna avanga him tawk tawh lo a nih avangin an khaw ram chung hmun danga insuan mai thain a khaw mipuite leh sorkar chuan a hria a. Hmalakna pawh eng emaw chen kalpui tawh a ni a. A khaw hmun thar tur an vat fai tawh a, khaw chung inkalpawhna kawng laih tan tawh a ni a. Mipui nitin mamawh petu Department ten eng emaw chen hma an lo la tawh bawk.

Meeting-ah hian Chief Town Planner, Town & Country Planning, UD & PA chuan khaw thar hi Hectare 60 biala zau tura duan, plot 105 nei, plot tin hi square meter 800 aia zau vek a ni a ti a. Plot pakhat chungah in pakhat bak sak phal loh ni se, in hi sak belh dawn chuan plot tharah zel dah ni se an ti a. A khua hi tihzauh zel theih tura duan a ni.

Vawiina meeting hian Master Plan hi a thenkhat an siam danglam hnuah a pawm a. Hma latu tur Nodal Agency an ruat nghal a. State Level-ah chuan Planning & Programme Implementation Department te ruat an ni a, District Level-ah Serchhip DC chu ruat a ni.

Neihloh khuaa chungtinte chu an in thar sakna tur cheng nuai 15 pek vek an ni dawn a. Sum leh pai hman belh tur nei ten lian zawk leh tha zawkin an chenna tur in hi an sa ang. In sak dan tur hi a hniam lam bituk siam sak vek a ni thung. Chhengkaw thenkhatin in sak tan an duh tawh avangin mamawh hmasate chak taka bawhzui ni se an ti.

Neihloh khua hi kum 1898 a din a ni a. Tunah hian chhungkaw 77, mihring 400 chuang hlek an awm mek a. Aizawl Thenzawl Lunglei kawngpui atanga tehin an khaw thar tur hi khaw hlui aiin a hnai zawk a, a ram a tha tawh hle ni a sawi a ni.

